

triarchalem Sedem sponte postea dimiserit, si quidem
 fides est adhibenda historicis Ægyptiis sectæ Theodosianæ
 propugnatoribus, qui apud Renaudotium in Histor. Ale-
 xandr. Patriarchar. Jacobitar. pag. 138. & seq. hæc ha-
 bent. „ Misit itaque (*Imperator Justinianus suâsuo Theo-*
 „ *doræ Conjugis*) Alexandriam Legatos, qui de ordina-
 „ tione ejus (*Theodosii*) inquirerent, num scilicet se-
 „ cundum Canones Ecclesiasticos facta fuisset. Illi ma-
 „ gna diligentia adhibita, quum cognovissent qua ratio-
 „ ne Gajanus per vim ordinatus fuisset, corruptis pecu-
 „ nia multis, qui ad ejus ordinationem consenserant,
 „ quique etiam tunc affirmabant, eam potiore fuisse:
 „ quod tamen probare non potuerunt: Legati interro-
 „ gatis Sacerdotibus & primariis Civibus centum viginti,
 „ quorum testimonia subscriptionibus firmata habuerunt,
 „ ordinationem Theodosii, tamquam prius factam & Ca-
 „ nonicam pronuntiaverunt. Deinde congregatis in Ec-
 „ clèsia majore Episcopis, Sacerdotibus, Imperatorif-
 „ que ministerialibus, Ducibus, primoribusque Civita-
 „ tis, allata sunt in medium Evangelia, tum Sigillum
 „ Imperiale cum Augusti imagine: adfuit quoque Theo-
 „ dosius. Et quum omnes seorsim interrogati fuissent,
 „ confessi sunt, illum primo ordinatum, accedente Episco-
 „ porum, sacerdotum, & populi consensu, secundum Ca-
 „ nones Ecclesiæ: elapsisque duobus mensibus, auditum
 „ esse, quod Gajanus ordinatus fuisset. Advenit ipse Ga-
 „ janus, & coram frequenti multitudine factus est, rem
 „ ita se habere, peccatique veniam postulavit. Alexan-
 „ drini quoque rogaverunt Theodosium, ut pœnitentiam
 „ ejus acceptam haberet, modo confiteretur, manusque
 „ suæ subscriptione testaretur, quæ ausus fuerat, facta
 „ esse contra Canonum Ecclesiæ disciplinam. Petierunt
 „ etiam, ut suscepta illius pœnitentia, ipse gradum Dia-
 „ conatus, quem antea habuerat, dignitatemque Archi-
 „ diaconi retineret, modo Patriarchæ obediret, ad fi-
 „ nem usque vitæ. Hæc annuente Theodosio & Gajano
 „ consentiente, concordia inita est, facto publico instru-
 „ mento, cui omnes subscripserunt. Atque ita pax Ec-